



Komisija za očuvanje nacionalnih spomenika, na osnovi člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 7. do 11. oktobra 2003. godine, donijela je

ODLUKU

I

Područje i ostaci graditeljske cjeline – Crkva Preobraženja Hristovog sa zgradom škole i grobljem u Klepcima proglašavaju se nacionalnim spomenikom Bosne i Hercegovine (u daljnjem tekstu: nacionalni spomenik).

Nacionalni spomenik se nalazi na lokaciji koja obuhvata k.č. 601, k.o. Klepci, općina Čapljina, Federacija Bosne i Hercegovine, Bosna i Hercegovina.

Na nacionalni spomenik se primjenjuju mjere zaštite i rehabilitacije utvrđene Zakonom o provedbi odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini ("Službene novine Federacije BiH", br. 2/02 i 27/02).

II

Vlada Federacije Bosne i Hercegovine (u daljnjem tekstu: Vlada Federacije) dužna je osigurati pravne, naučne, tehničke, administrativne i finansijske mjere za zaštitu, konzervaciju, prezentaciju i rehabilitaciju nacionalnog spomenika.

Vlada Federacije dužna je osigurati sredstva za izradu i provedbu potrebne tehničke dokumentacije za rehabilitaciju nacionalnog spomenika.

Komisija za očuvanje nacionalnih spomenika (u daljnjem tekstu: Komisija) utvrdit će tehničke uvjete i osigurati finansijska sredstva za izradu i postavljanje informacione ploče sa osnovnim podacima o spomeniku i odluci o proglašenju dobra nacionalnim spomenikom.

III

U cilju trajne zaštite nacionalnog spomenika utvrđuje se zona zaštite koja obuhvata k.č. 601, posjedovni list br. 349/01, k.o. Klepci. U sklopu ove zone utvrđuju se sljedeće mjere zaštite:

- zabrana građenja stambenih, privrednih, poljoprivrednih i drugih objekata;
- dopušta se rehabilitacija nacionalnog spomenika uz projekat rehabilitacije odobren od federalnog ministarstva nadležnog za prostorno uređenje i stručni nadzor nadležne službe zaštite naslijeđa na nivou Federacije Bosne i Hercegovine (u daljnjem tekstu: nadležna služba zaštite);
- zabrana odlaganja svih vrsta otpada;
- zabrana obavljanja svih radova na infrastrukturi osim u izuzetnim slučajevima uz odobrenje federalnog ministarstva nadležnog za prostorno uređenje i stručni nadzor nadležne službe zaštite;
- zabrana izgradnje magistralnih infrastrukturnih ili energetskih objekata, zabrana postrojenja za eksploataciju kamena i drugih zagađivača u toku čije izgradnje ili eksploatacije može doći do oštećenja nacionalnog spomenika.

Vlada Federacije dužna je posebno osigurati provedbu sljedećih mjera:

- izvršiti izradu programa raščišćavanja objekta crkve i škole koji će obuhvatiti sljedeće postupke i mjere:
- snimanje stanja na terenu sa identifikacijom ulomaka crkve i škole i njihovim sortiranjem;
- zaštita intaktnih dijelova zidova, temelja i poda;
- obimne istraživačke radove koji će obuhvatiti ispitivanje stabilnosti i strukture postojećih temelja objekta, podova, ispitivanje nosivosti tla, petrografskih i hemijskih svojstava kamena i ostalih građevinskih materijala – maltera, prikupljanje podataka i informacija za izradu projekta rehabilitacije;
- izvršiti arheološka istraživanja (sondaže) jer ima indicija da postoje ostaci iz srednjovjekovnog perioda.

Pripremni radovi moraju biti izvedeni prema sljedećim uvjetima:

- sve pripremne radove za rehabilitaciju vodit će nadležna služba zaštite;
- svi radovi se moraju obaviti prema programu raščišćavanja i uz stalni nadzor nadležne službe zaštite;
- prilikom radova na raščišćavanju područja nacionalnog spomenika nije dopuštena upotreba teške građevinske mehanizacije;
- postojeći intaktni temelji, zidovi, podovi i njihovi dijelovi bit će sačuvani i zaštićeni od oštećenja, snimljeni, ispitani i konzervirani kako bi se projektom rehabilitacije moglo predvidjeti njihovo ponovno ugrađivanje u objekte;
- ostaci crkve i škole ne smiju se oštetiti, niti iznositi izvan ograđenog prostora cjeline nacionalnog spomenika ;
- ukoliko se utvrdi da je za neke posebno vrijedne ulomke potrebno izvršiti konzervatorske ili restauratorske radove izvan prostora cjeline crkve, fragmente je potrebno fotografski dokumentirati, numerirati i obavijestiti vlasnika dobra o privremenom iznošenju dobra;
- izvršiti čišćenje od samoniklog bilja cijele lokacije.

Projekat rehabilitacije mora sadržavati sljedeće uvjete:

- objekat crkve zajedno sa školskim objektom rekonstruirati u izvornom obliku, sa identičnim horizontalnim i vertikalnim dimenzijama, primjenjujući tradicionalne tehnike građenja i istovrsne građevinske materijale;
- sve originalne fragmente objekta koji budu pronađeni ili na lokaciji ili na nekom drugom mjestu, a na koje su odvezeni nakon rušenja objekata, ponovno se moraju ugraditi u objekte metodom anastiloze uz upotrebu tradicionalnih građevinskih materijala i veziva (maltera) i tehnika građenja. Do momenta ugradnje potrebno ih je na odgovarajući način zaštititi;
- fragmente koji se zbog visokog stepena oštećenja ne mogu ugraditi, nakon izvršenih laboratorijskih ispitivanja, na odgovarajući način konzervirati i prezentirati u sklopu objekta;
- sav iskoristivi materijal ponovno ugraditi u objekat crkve, odnosno škole;
- dijelove koji nedostaju, a za koje postoji dokumentacija o njihovom izvornom stanju, uraditi na osnovi postojeće dokumentacije od materijala koji su istovrsni ili slični izvornim, uz korištenje metode reпрistinacije;
- kompleks crkve i škole rekonstruirati na osnovi podataka o ranijem izgledu;
- sve nadgrobne spomenike konzervirati.

IV

Stavljaju se van snage svi provedbeni i razvojni prostorno-planski akti koji su u suprotnosti sa odredbama ove odluke.

V

Svako, a posebno nadležni organi Federacije Bosne i Hercegovine, kantona, gradske i općinske službe suzdržat će se od poduzimanja bilo kakvih radnji koje mogu oštetiti nacionalni spomenik ili dovesti u pitanje njegovu zaštitu i rehabilitaciju.

VI

Ova odluka dostavit će se Vladi Federacije, federalnom ministarstvu nadležnom za prostorno uređenje, nadležnoj službi zaštite, općinskom organu uprave nadležnom za poslove urbanizma i katastra, radi provedbe mjera utvrđenih u tač. II - V ove odluke i nadležnom općinskom sudu radi upisa u zemljišne knjige.

VII

Sastavni dio ove odluke je obrazloženje sa pratećom dokumentacijom, koje je dostupno na uvid zainteresiranim licima u prostorijama i na web stranici Komisije (<http://www.aneks8komisija.com.ba>).

VIII

Prema članu V, stav 4. Aneksa 8. Općeg okvirnog sporazuma za mir u Bosni i Hercegovini, odluke Komisije su konačne.

IX

Ova odluka stupa na snagu danom donošenja i objavit će se u «Službenom glasniku BiH» .

Ovu odluku Komisija je donijela u sljedećem sastavu: Zeynep Ahunbay, Amra Hadžimuhamedović, Dubravko Lovrenović, Ljiljana Ševo i Tina Wik.

Broj: 07-6-982/03-2
9.oktobra 2003. godine
Sarajevo

Predsjedavajuća Komisije
Amra Hadžimuhamedović